

Bosna i Hercegovina  
FEDERACIJA BOSNE I HERCEGOVINE  
UNSKO-SANSKI KANTON  
KANTONALNI SUD U BIHAĆU  
Broj: 01 0 K 007112 12 K  
Bihać, 07.12.2012. godine

Pravosnažno 26.12.2012. godine.  
Presuda na osnovu sporazuma o  
priznanju krivnje.

## U IME FEDERACIJE BOSNE I HERCEGOVINE!

Kantonalni sud u Bihaću u vijeću sastavljenom od sudija: Vojislava Pušca kao predsjednika vijeća, te Deliste Delić i Muhameda Cimirotića, kao članova vijeća, uz sudjelovanje zapisničara Kornelija Butkovića, postupajući u krivičnom predmetu optuženog Delić Safeta, zbog krivičnog djela Ratni zločin protiv civilnog stanovništva iz člana 142 stav 1 preuzetog KZSRJ, postupajući po optužnici Kantonalnog tužilaštva iz Bihać broj; T01 0 KTRZ 0012626 12 od 23.10.2012. godine, nakon razmatranja sporazuma o priznanju krivnje T01 0 KTRZ 0012626 12 od 27.11.2012.godine i glavne rasprave za izricanje krivično-oravne sankcije održane dana 07.12.2012.godine, u prisustvu Kantonalnog tužioca Jasmina Mesića, optuženog Safeta Delića, i njegovog branioca po službenoj dužnosti Alaga Bajramovića, advokata iz Bihaća, donio je i javno objavio dana 07.12.2012.godine, slijedeću ;

## PRESUDU

### Optuženi :

**1. DELIĆ SAFET zv. Soja** sin H. i majke R. rođene K., rođen 19.10.1973. godine u ..., općina ..., gdje je i nastanjen, JMB ..., pismen, sa završenih 5. razreda OŠ, nezaposlen, neoženjen, bez djece, vojsku služio 1993 godine u K., lošeg imovnog stanja, po narodnosti ..., državljanin ..., do sada osudjivan..., nalazio se u pritvoru po rješenju Kantonalnog suda u Bihaću br. 01 0 K 007112 12 Kpp 2 od od 05.10.2012.godine, a u pritvoru je proveo vrijeme od 04.10.2012.-24.10.2012.godine.

### KRIV JE ;

Što je,

Kršeci pravila Međunarodnog prava sadržana u IV Ženevskoj konvenciji o zaštiti građanskih lica za vrijeme rata od 12. augusta 1949 godine, Dopunskog protokola o zaštiti žrtava nemeđunarodnih oružanih sukoba (Protokol II) uz navedenu konvenciju, za vrijeme oružanog sukoba u BiH između Armije RBiH i tzv. Narodne odbrane Autonomne pokrajine Zapadna Bosna , kao pripadnik 506 Brigade 5. Korpusa Armije BiH, postupao suprotno Pravilima Medjunarodnog humanitarnog prava kršeci odredbe čl. 3. st. 1. tačka c. Ženevske konvencije o zaštiti građanskih

lica za vrijeme rata od 12. augusta 1949 godine, u vezi sa čl. 4. st. 1. i 2. tačka e. Protokola II uz navedenu konvenciju tako što je:

Dana 07.08.1995 godine, u večernjim satima, u mjestu P., općina V. K., u uniformi, naoružan automatskom puškom, zajedno sa još jednim nepoznatim vojnikom, došao pred porodičnu kuću oštećene K. F., (kasnije udate T.), čiji su bliski srodnici bili pripadnici „autonomne pokrajine Zapadna Bosna“ te pokucao na ulazna vrata kuće, govoreći „otvaraj, Soja je“, nakon čega je njena snaha K. Š. otvorila vrata, da bi osumnjičeni, zajedno sa NN vojnikom ušao u kuću pitajući istu „gdje je S.“, što je bio nadimak oštećene K. F., pa kada mu je ista odgovorila da F. spava u svojoj sobi, osumnjičeni Delić Safet, znajući gdje se nalazi njena soba krenuo uz stepenice na sprat kuće, te je po ulasku u sobu oštećene počeo galamiti, naređujući istoj da sjedne sa druge strane stolića, što je ona i učinila, a zatim je osumnjičeni uhvatio za ruku izgovarajući riječi „S., ti moraš spavati sa mnom“, nakon čega je ona krenula da izađe iz sobe, pa je osumnjičeni ustao i udario je kundakom puške u glavu, usljed čega je oštećena pala na pod, a zatim je nastavio tući i trgati odjeću te istu prisilio na seksualni odnos.

Dakle, kršeći pravila međunarodnog prava za vrijeme rata u BiH izvršio silovanje.

Čime je počinio krivično djelo - ratni zločin protiv civilnog stanovništva iz čl. 142. st.1. preuzetog KZ SFRJ, pa se na osnovu tog zakonskog propisa, a uz primjenu članova 41, 42 i 43 istog zakona ;

## **O S U Đ U J E**

### **NA KAZNU ZATVORA U TRAJANJU OD 3 (TRI) GODINE I 6 (ŠEST) MJESECI.**

Po članu 57 KZFBiH vrijeme koje je optuženi proveo u pritvoru, po rješenju ovoga suda od 04 do 24.10.2012.godine, uračunava se u izrečenu kaznu zatvora.

Po članu 202 stav 4 ZKPFBiH optuženi se oslobađa plaćanja troškova krivičnog postupka i isti padaju na teret ovoga suda.

Po članu članu 212 stav 3 ZKPFBiH, oštećena K. F. udata T., sa svojim imovinsko-pravnim zahtjevom upućuju se na parnicu.

## **O b r a z l o ž e n j e**

Kantonalno tužilaštva Bihać pod brojem: T01 0 KTRZ 0012626 12 od 23.10.2012. godine podignuo je optužnicu protiv Delić Safeta, stavljajući mu na teret izvršenje krivičnog djela Ratni zločin protiv civilnog stanovništva iz člana 142 stav 1 preuzetog KZSFRJ.

U toku priprema za glavnu raspravu, u spis predmeta uložen je sporazum o priznanju krivnje broj T01 0 KTRZ 0012626 12 od 27.11.2012. godine, kojeg su dana 27.11.2012.godine zaključili Kantonalni tužilac Mesić Jasmin i optuženi Delić Safet sa svojim braniocem advokateom Alagom Bajramovićem iz Bihaća. Prema

navedenom sporazumu optuženi Delić Safet je priznao, da je na način i u vrijeme kako je to činjenično opisano u izreci optužnice, počinio krivično djelo Ratni zločin protiv civilnog stanovništva iz člana 142 stav 1 preuzetog KZ SFRJ. Pri tom se sporazumio, da priznaje krivnju i odriče se prava na suđenje, prihvaća da ne može uložiti žalbu na krivično-pravnu sankciju koja će mu biti izrečena, u slučaju da sporazum bude prihvaćen od strane suda. Posebno je u sporazumu navedeno, da optuženi razumije, da priznanje krivnje uključuje i posljedice vezane za troškove krivičnog postupka, te pravo oštećene na naknadu štete, koju će ova ostvarivati putem parnice pred sudom. Optuženi je prihvatio da se prema navedenom sporazumu za navedeno krivično djelo, njemu izrekne kazna zatvora u rasponu od 3 do 4 godine.

Prilikom razmatranja sporazuma o priznanju krivnje, sud je utvrdio da je optuženi sporazum zaključio dobrovoljno, svjesno i sa razumijevanjem, da je upoznat sa svim posljedicama koje proističu iz sporazuma, uključujući tu i posljedicu vezanu za imovinsko-pravni zahtjev, kao i troškove krivičnog postupka. Posebno, da optuženi razumije da se prihvatanjem sporazuma odriče prava na suđenje i da neće moći uložiti žalbu na krivično-pravnu sankciju koja će mu se izreći, ukoliko sud prihvati sporazum.

Sud je utvrdio da je oštećenoj omogućeno izjašnjenje o imovinsko-pravnom zahtjevu pred tužiocem, te da je predložena krivično-pravna sankcija u skladu sa krivičnim zakonom.

Prilikom razmatranja sporazuma o priznanju krivnje, razmotreni su dokazi predloženi od tužioca, te je izvan svake razumne sumnje utvrđeno, da su se u radnjama optuženog, kako u objektivnom tako i u subjektivnom smislu stekla sva bitna obilježja krivičnog djela, Ratni zločin protiv civilnog stanovništva iz člana 142 stav 1 preuzetog KZSFRJ, za koje je oglašen krivim. Krivnja optuženog, utvrđuje se prije svega na osnovu njegovog iskaza u kojem u cjelosti priznaje radnju izvršenja, a tu radnju identično opisuje i potvrđuje oštećena K. F., a činjenično stanje proizilazi i iz drugih dokaza, da je optuženi dana 07.08.1995.godine, kršeći pravila Međunarodnog prava sadržanog u IV Ženevskoj konvenciji o zaštiti građanskih lica za vrijeme rata, dopunskog protokola o zaštiti žrtava nemeđunarodnih oružanih sukoba, a za vrijeme oružanog sukoba u BiH između Armije RBiH i tzv. Narodne odbrane Autonomne pokrajine Zapadna Bosna, kao pripadnik 506. brigade 5. korpusa Armije BiH, kršeći pravila Međunarodnog humanitarnog prava i to konkretno odredbe člana 3 stav 1 tačka c) Ženevske konvencije, u vezi sa članom 4 stav 1 i 2 tačka e) protokola II uz navedenu konvenciju, tako što je u večernjim satima u mjestu P. općina V. K., uniformiran i sa automatskom puškom, sa jednim nepoznatim vojnikom došao pred kuću K. F., znajući da su njeni bliski srodnici pripadnici APZB, pokucali na ulazna vrata, tražeći da se ista otvore i predstavljajući se nadimkom „S.“, pa kada je K. Š. otvorila vrata, ušao u kuću te otišao do sobe gdje je spavala K. F., tražeći od nje da s njim spava, pa kada je K. F. odbila i pokušala izići iz sobe, udario je kundakom puške u glavu a zatim je nastavio tući i trgati odjeću i tada je prisilio na seksualni odnos.

Sve naprijed navedene činjenice jasno proizilaze iz priznanja optuženog kojeg je dao u istrazi, u prisustvu branioca, gdje je detaljno priznao učinjenje krivičnog djela, iskaza oštećene K. F. udate T., svjedoka K. Š., svjedoka K. H. i iskaza drugih

svjedoka, te ostalih dokaza, iz kojih je sud izveo pouzdane i uvjerljive zaključke o postojanju dovoljnih dokaza o krivnji optuženog za učinjeno krivično djelo.

Vijeće ovoga suda je prihvatilo sporazum o priznanju krivnje, a zatim ocjenom svih olakšavajućih i otežavajućih okolnosti optuženog oglasilo krivim i uz ublažavanje propisane kazne, osudilo ga na kaznu zatvora u trajanju od 3 godine i 6 mjeseci uz primjenu odredbe iz člana 142 stav 1, te članova 42 i 43 preuzetog KZ SFRJ. Prilikom odlučivanja o visini kazne zatvora, sud je cijenio sve olakšavajuće i otežavajuće okolnosti koje su se stekle na strani optuženog. Tako je utvrdio da je optuženi priznao krivično djelo u detalje, da je na taj način olakšao dokazivanje krivičnog djela, da je u vrijeme učinjenja krivičnog djela bio mlad sa manje od 22 godine života, a krivično djelo je izvršio u ratnim uvjetima, povećanih tenzija na području učinjenja krivičnog djela, a pri tom u stanovitom alkoholiziranom stanju. Kao olakšavajuću okolnost sud je cijenio njegovo siromašno imovinsko stanje, imajući u vidu da nije zaposlen i nema imovine. Od otežavajućih okolnosti sud je cijenio težinu učinjenog krivičnog djela, okolnosti počinjenja, zatim trajne posljedice koje je krivično djelo ostavilo na oštećenu, a što proizilazi iz rezultata psihijatrijskog vještačenja oštećene.

U smislu člana 57 KZFBiH u izrečenu kaznu zatvora je uračunato vrijeme koje je optuženi proveo u pritvoru od 04 do 24.10.2012.godine.

U smislu člana 202 stav 4 ZKPFBiH optuženi je oslobođen plaćanja troškova krivičnog postupka, jer je utvrđeno da nema imovine, nije zaposlen, tako da nema sredstava za plaćanje troškova, pa bi suprotna odluka dovela do ugrožavanja njegove egzistencije.

U smislu člana 212 stav 3 ZKPFBiH sud je oštećenu K. F. udatu T. sa imovinsko-pravnim zahtjevom uputio na parnicu, jer podaci krivičnog postupka nisu pružali osnov za presuđenje, zbog toga što oštećena nije specificirala visinu odštetnog zahtjeva.

#### **PRAVNA POUKA:**

Protiv ove presude dopuštena je žalba Vrhovnom sudu FBiH u Sarajevu u roku od 15 dana od prijema, a putem ovoga suda.

Žalba nije dopuštena zbog odluke o izrečenoj krivično-pravnoj sankciji (član 246 stav 4 tačka c) ZKPFBiH)

**Zapisničar:**  
Kornelije Butković

**Predsjednik vijeća:**  
Vojislav Pušac